

- 1<sup>r</sup> Wer singt Cras Cras glich wie eyn rapp
- 2<sup>r</sup> Der blibt eyn narr biß jnn syn grapp
- 3<sup>r</sup> Morn hat er noch eyn grösser kapp

Kap. 31



## Von vffschlag suchen

- 1 Der ist eyn narr / dem gott jn gyt
- 2 Das er sich bessern soll noch hüt
- 3 Vnd soll von synen sünden lan
- 4 Eyn besser leben vohen an

5 Vnd er jm selbs sũcht eyn vffschlag  
 6 Vnd nymbt zyl vff eyn andern tag  
 7 Vnd singt Cras / Cras / des rappen gsang  
 8 Vnd weißt nit / ob er leb so lang /  
 9 Dar durch sint narren vil verlorn  
 10 Die all zytt sungen / morn / morn / morn /  
 11 Was sũnd an trifft / vnd narrheyt sust  
 12 Do ylt man zũ mit grossem lust  
 13 Was gott an trifft / vnd recht ist gthon  
 14 Das will gar schwärlich naher gon  
 15 Vnd sũcht eyn vffschlag jm all zyt  
 16 Bychten ist besser morn dann hüt  
 17 Morn went wir erst recht leren tũn  
 18 Also spricht manch verlornen sũn  
 19 Das selb morn / kumbt dann nyemer me  
 20 Es flücht vnd schmiltzt glich wie der schne  
 21 Biß das die sel nym bliben mag  
 22 So kumbt dann erst der mornig tag  
 23 So würt von we der lib gekrenckt  
 24 Das er nit an die sel gedenckt  
 25 Also verdurben jn der wũst  
 26 Der juden vil / der keyner müst  
 27 Noch solt gantz kumen jn das landt  
 28 Das gott verhieß mit syner handt  
 29 Wer hüt nit gschickt zũ rüwen ist  
 30 Der fyndt morn me das jm gebrist  
 31 Wãn hüt berũfft die gottes stym  
 32 Der weißt nit / ob sie morn rüff jm  
 33 Der sint vil tusent yetz verlorn  
 34 Die meynten besser werden morn

---

18 Also *GW5046 GW5047* ] Als *GW5041* manch *GW5046* ] mancher *GW5041 GW5047*